

DJADUMINGU

## **Dios ke Manda un Mensahe pa Bo**

Kiko ta move un profeta pa hiba e mensahe?

Imaginá bo pa un momentu ku nunca bo a tende tokante Kristianismo. Direpente bo ta topa ku un buki riba kaya. Bo ta koh'é i e ta djis bisa “Beibel Santu” riba e kaft—nada tokante e outor. Ta ken a skirbié?

E promé kos ku mi ta hasi ora mi kohe un buki, ademas di lesa e título, ta wak ken ta su outor. Dor ku mi a traha den e kampo di publikashon, mi sa eksaktamente unda mi por haña e informashon akí: riba e página di derecho di outor. Pero sorpresa! Ora bo habri e “Beibel Santu”, e informashon tokante e outor di Beibel no tei.

Kiko e lesadó di promé biaha—esun ku ta aserká e Beibel pa promé biaha—mester asumí? Ta ken a skirbié? Kon el a yega serka nos? Ken a hink'é den otro? Naturalmente, asta un laiko den asuntunan religioso sa ku Kristiannan ta reklamá ku e Beibel tin su orígen den Dios Mes. Esei ta nifiká ku Beibel, manera nos konos'é awe, a kai for di shelu? Dios tin “sekretarianan” òf editornan? El a ser skirbí dor di Dios òf dor di sernan humano?

Un desishon klave ku nos mester tuma ora nos ta aserká e fenómeno di Beibel ta di determiná sea nos lo analis'é for di puntonan di bista ku ta straño na dje, òf duna prioridat na e forma den kua e ta definí su mes. Pa nos akumulá su nifikashon, lo no ta hustu pa e buki i su outor (òf outornan) pa ignorá loke Beibel ta bisa tokante su mes i su orígen.

Un di e eskritornan di mas kreativo den Beibel, apòstel Pablo, a nota abiertamente: “Tur Skritura ta inspirá pa Dios i ta útil pa siñansa, pa reprimimentu, pa korekshon, pa eduká den hustisia, pa e hende di Dios por ta perfekto, ekipá pa tur bon obra” (2 Tim. 3:16 17).

Den e mesun tono, apòstel Pedro ta deklará: “I asina nos tin e palabra profétiko pa mas siguransa, na kual boso ta hasi bon di pone atenshon, komo na un lampi ku ta lusa den un lugá skur, te ora dia habri i e strea di mardugá sali den boso kurason. Ma komprendé esaki promé ku tur kos, ku ningun profesia di Skritura no ta un asuntu di interpretashon personal, pasobra nunca profesia no a wòrdu duná pa medio di e boluntat di hende, ma hòmbènan santu di Dios a papia, inspirá dor di Spiritu Santu.

E testifikashon-propio bíbliko ta afirmá ku e Skrituranan ta “inspirá” pa Dios. E profetanán a papia segun ku nan tabata “ser inspirá” pa Spiritu Santu.

E dos pasashinan bíbliko akí ta kontené un informashon detayá tokante e orígen i naturalesa di Beibel. Nan ta deklará (1) ku e Skrituranan tabatin nan orígen den Dios, i E ta esun kende ta tuma rienda ora E ta revelá Su mes komunikando ku sernan humano; (2) ku revelashon ta tuma lugá a traves di e fenómeno di “inspirashon” (Griego: *theopneustos*); i (3) ku e fenómeno akí ta apliká na henter Beibel.

Ora nos konsiderá e versíkulonan akí tokante e orígen di Beibel, ta importante pa nos tene den mente tantu loke nan ta afirmá komo loke nan no ta afirmá. Miéntras e énfasis ta riba Dios siendo e *outor* di Beibel, e pasashinan no ta deklará ku E ta e *eskritor*. E eskritornan, “hòmbènan santu di Dios”, tabata esnan ku a registrá e revelashon bou di “inspirashon” divino.

Asina apòstel Pedro ta deklará klaramente ku aunke sernan humano ta e agentenan físiko di e Skrituranan, e orígen di revelashon—e fuente di e contenido ku ta ser hañá den e

Skrituranan—ta Dios Mes. Aktivitat humano ta tuma parti den e proseso, ma e no ta e fuente for di kua e splikashon-, eksposishon-, òf interpretashonnan kontené den e Skrituranan ta surgi.

### **Kon Inspirashon ta Tuma Lugá**

E pregunta ta keda: Kon nos mester komprondé e relashon entre e Outor divino i eskritornan humano? Ki parti kada un di e aktornan akí ta hunga? Kon e proseso di revelashon akí a ser inkorporá den e Skrituranan?

Asta un aserkamentu superfisial na e Beibel komo un buki ta suficiente pa un lesadó realisá ku e skirbimentu di e Beibel no tabata un fenómeno masivo ku a desaroyá den un tempu kòrtiku i di mesun forma durante tur e tempu. Al kontrario, Beibel, manera el a yega serka nos, ta resultado di masoméno 40 eskritor ku a laga nan testimonio riba 15 siglo den tres diferente idioma: Hebreo, Arameo, i Griego. Un aserkamentu mas akadémiko lo a muestra ku e hopi estilonan literario ta korelá ku e kantidat di outor i e diversidat di kulturanan representá.

Asina anto, kon e Beibel a ser hinká den otro?

E versíkulonon ku nos a analisá brevemente (2 Tim. 3:16; 2 Pedro 1:21) ta deklará di forma kategórikiko ku Dios “a inspirá” e Skrituranan. E palabra, sinembargo, ta mucha amplio pa artikulá un splikashon di kon e método divino pa komuniká e boluntat di Dios den skirbimentu ta funshoná den práktika.

Konsiderando e deklarashonnan di Skritura mes—e Beibel den su forma skirbí—eruditonan a purba komprondé kon e fenómeno di inspirashon ta funshoná. Aunke komo Atventistanan di e di Shete Dia nos ta rechasá e teoria di inspirashon mekániko òf verbal (nos no ta kere ku tur palabra di Skritura a ser diktá pa Spiritu Santu), nos ta kere sí ku e proseso di

revelashon i inspirashon a influensíá e palabranan di e profetanan. Spiritu Santu a guia e profetanan den e proseso di skirbimentu, segurando ku e profetanan su propio palabranan tabata ekspresá di forma outoritativo i konfiabel e mensahe ku nan a risibí. Pa e motibu ei, “palabranan ta intrínstiko na e proseso di revelashon i inspirashon.” - Raoul Dederen, “Toward a Seventh-day Adventist Theology of Revelation-Inspiration,” in *North American Bible Conference 1974* (Silver Spring, Md: North American Division of Seventh-day Adventists, 1974), p. 10.

De echo, Dios a guia e eskritornan mes, ken na nan turno a ekspresá e revelashon divino den nan propio palabranan. Konsekuentemente, e manera ku e eskritornan bíbliko a ekspresá nan mes—e palabranan skohé pa transmití e mensahe divino—tabata nan propio eskoho, guiá pa Spiritu Santu. Den otro palabra, e eskritornan di Beibel tabata e eskribanan di Dios, no Su pènnan.

Miéntas eskritornan bíbliko a uza e vehíkulo “imperfekto” di lenguahe humano, e Palabra di Dios ta e revelashon supremo, outoritativo, i sigur di e boluntat di Dios. Pues, e vehíkulo humano imperfekto ta komuniká e bèrdat. Sinembargo, den e mesun forma ku e naturalesa divino-humano di Kristu ta indivisibel, tambe e kontenido i e vehíkulo no por ser separá den Beibel; e ta imposibel. Den e fenómeno divino-humano akí, Dios ta generá informashon i ta guia e proseso di skirbimentu sin nulifiká ningun individualismo òf abilidadat humano, pero E ta sigurá ku e resultado di henter e proseso ta konfiabel i bèrdat pa ku Su propósito.

## **SUGERENSINANAN PA ORASHON**

1. Hasi orashon pa persepshon den e vários partinan di Beibel i loke Dios ta deseá pa duna bo for di e hopi partinan pa oumentá bo komprondementu.
2. Pidi pa konfiansa i disernimentu den e proseso di inspirashon a traves di kua e Skrituranan a ser duná na nos.
3. Alabá Dios pa e variedat di mensahenan duná na nos den Su Palabra, inkluyendo parábola-, proverbio-, poema- i profesianan.